

Sifat malu didik akhlak mulia

■ Benteng menjaga diri daripada melakukan kemungkaran, maksiat

Manusia yang waras memiliki sifat malu. Mereka bukan sekadar menutup tubuh badan dengan pakaian, bahkan menjaga tingkah laku dan tutur kata supaya tidak digolongkan sebagai orang yang tidak tahu malu.

Dalam Islam, sifat malu bukan hanya ditekankan dalam soal perhubungan sesama manusia. Ia turut membabitkan hubungan manusia dengan Tuhannya. Mereka yang ada sifat malu mentaati suruhan-Nya dan menjaui larangan-Nya.

Kehidupan kita di dunia ini semuanya atas rahmat dan kasih sayang-Nya. Maka, bagi sesiapa yang berhasrat untuk melakukan kemungkaran kepada-Nya, dia perlu ada rasa malu kepada-Nya. Rasa malu inilah yang akan menutup pintu nafsu jahat kita.

Seseorang yang melakukan maksiat dan kemudiannya memohon pertolongan kepada-Nya agar memakbulkan hajatnya, bukankah dia sepatutnya perlu berasa malu atas tindakannya itu?

Apa tidaknya, pada satu keadaan dia ingkar kepada Tuhannya dan pada keadaan lain pula dia meminta bantuan-Nya.

Inilah antara perkara yang kita perlu insafi. Sematkan rasa malu melakukan maksiat atau

kemungkaran kerana hakikatnya kita adalah hamba yang sentiasa mengharap belas ihsan daripada-Nya.

"Dan janganlah kamu berbuat kerosakan di bumi sesudah Allah menyediakan segala yang membawa kebaikan padanya dan berdoalah kepada-Nya dengan perasaan bimbang (kalau-kalau tidak diterima) dan dengan perasaan terlalu mengharap (supaya makbul).

"Sesungguhnya rahmat Allah itu dekat kepada orang yang memperbaiki amalannya." (Surah al-A'raf, ayat 56)

Malu adalah sebahagian

daripada iman seperti dinyatakan dalam hadis Rasulullah SAW yang diriwayatkan oleh Imam al-Bukhari.

Dari sini, dapat difahami bahawa sifat malu antara perkara yang sangat penting bagi setiap Muslim. Hal ini kerana ia terkait dengan kesempurnaan iman yang tentunya perkara asas dalam agama.

Cuba kita perhatikan beberapa hal di sekeliling kita pada hari ini. Ada yang mendedahkan aurat,

mengambil hak orang, memukul dan membunuh orang, membuat fitnah dan membuka aib orang

lain. Apakah mereka tidak malu kepada Allah dan khalayak manusia?

Hakikatnya, sifat malu adalah benteng untuk menjaga diri daripada melakukan maksiat. Apabila seseorang itu tiada sifat malu, nescaya dia sanggup melakukan apa saja walaupun ditegah ibu bapa, bercanggah dengan agama dan peraturan dikuatkuasakan kerajaan.

Perkara ini pernah disentuh Rasulullah SAW dalam hadis Baginda, mafhumnya: "Apabila engkau tidak malu, maka kerjakanlah apa yang engkau kehendaki." (Riwayat al-Bukhari)

Memang benar, orang yang tidak memiliki sifat malu tidak pernah berasa bersalah atau berdosa. Malah, dia tidak ambil peduli pandangan dan teguran orang lain terhadapnya.

Jadi, marilah kita membentengi diri daripada kemungkaran dengan sifat malu dan sama-sama menjaganya supaya tidak hilang begitu saja.

FAKTA
Kehidupan kita di dunia ini semuanya atas rahmat dan kasih sayang-Nya



DIDIK anak supaya ada sifat malu untuk melakukan perbuatan dilarang sejak kecil.



Sehari sepotong ayat

"Dan belanjakanlah (apa yang ada pada kamu) kerana (menegakkan) agama Allah dan janganlah kamu sengaja mencampakkan diri kamu ke dalam bahaya kebinaasaan (dengan bersikap bakhil) dan baiklah (dengan sebaik-baiknya segala usaha dan perbuatan kamu kerana sesungguhnya Allah mengasihni orang-orang yang berusaha memperbaiki amalannya."

(Surah al-Baqarah, ayat 195)

Sikap bakhil memberi harta benda, ilmu pengetahuan atau daya usaha kerana mempertahankan agama dan negara daripada ancaman musuh dianggap sebagai sengaja membiarkan diri jatuh ke dalam bahaya kebinaasaan. Sebab sikap yang demikian bermakna membiarkan kelemahan pertahanan agama, bangsa dan negara serta membiarkan pihak musuh berpeluang menyerang. Demikian juga dalam perkara lain, agama kita sentiasa menyuruh supaya kita berikhtiar sedaya upaya menajutkan diri daripada segala yang merosakkan dan membawa kepada kebinaasaan

- Tafsir Pimpinan ar-Rahman

Sebabnya, selagi kita berasa malu, selagi itulah kita terpelihara daripada melakukan kemungkaran.

Dalam hadis diriwayatkan al-Bukhari dan Muslim, Rasulullah SAW bersabda, mafhumnya: "Sifat malu itu akan menghasilkan kebaikan."

Penulis penyarah UNISZA